

ARREST CONTRADICTOIRE
 DV CONSEIL,

PAR LEQUEL IL A ESTE' IVGE'
 qu'un Seigneur d'une Paroisse ayant fait
 bastir une Chapelle en sa maison, &
 estably quelque Confrairie où il se re-
 çoit des aumosnes, le compte en doit
 estre rendu à l'Euesque: Et qu'à l'adue-
 nir il sera nommé un Administrateur
 qui prestera le serment audit sieur Eues-
 que.



A PARIS,
 Chez Antoine Vitré, Imprimeur ordinaire du
 Roy, & du Clergé de France.

M. DC. LV.


Avec Privilege de sa Majesté.

THE NEWBERRY LIBRARY
CHICAGO, ILL.
JAN 12 1911
390
1326

Case
F
390
1326
1655fc



THE NEWBERRY LIBRARY
CHICAGO, ILL.
JAN 12 1911
390
1326



EXTRAIT DES REGISTRES
du Conseil Privé du Roy.

ENTRE Messire Balthazar Grangier
Euesque & Comte de Treguier,
Conseiller du Roy en ses Conseils,
demandeur en Lettres du grand Sceau du
quinziesme Septembre 1654. & en execu-
tion d'Arrest dudit Conseil du douziesme
Mars 1655. d'une-part. Et Louys de Ker-
mel de Kermesen deffendeur d'autre. Veu
par le Roy en son Conseil l'instance d'entre
les parties, lesdites Lettres du quinziesme
Septembre 1654. à ce que l'Arrest du Par-
lement de Bretagne du sixiesme Aoust au-
dit an, & tout ce qui s'en est ensuiuy soit
cassé & reuoqué comme rendu par Iuges
incompetens, mesme depuis & au prejudi-
ce de l'euocation generale dudit deman-
deur : Ce faisant, ordonné que les comptes
des aumosnes & confrairie de la Chapelle
sainte Anne de Kermesen seront rendus
incessamment deuant le sieur Euesque &
ses grands Vicaires & Officiaux, & ce en
execution de plusieurs Arrests rendus au-
dit Conseil, & le deffendeur condamné
aux despens. Exploit d'assignation donnée

audit Conseil audit Kermesen aux fins desdites Lettres, du huietiesme Octobre audit an 1654. Copie collationnée d'Arrest du grand Conseil du sixiesme Aoust 1623. rendu entre Messire Guy Champion Euesque dudit Treguier, d'une part: Et les Chanoines & Chapitre, Iuges & Officiers de Lanyon, d'autre: Par lequel est entr'autres choses ordonné que les comptes des cens, rentes, reuenus & domaines destrois Cures & Vicairies de l'Eglise de Treguier, & Chapelle S. Yves, seroient rendus à l'aduenir pardeuant ledit sieur Euesque, en presence du Substitut du Procureur general, pour estre les deniers employez suiuant les fondations; avec deffenses ausdits Iuges de Lanyon d'en connoistre. Requête présentée audit sieur Euesque de Treguier par Henry de Kermesen le 21. Mars 1643. afin de fondation & dotation de ladite Chapelle particuliere de sainte Anne qu'il auoit fait eriger & construire dans vn bois & pourpris dependant de sadite terre de Kermesen. Prouision expediee sur ladite requête par ledit sieur Euesque de Treguier le huietiesme Aueil audit an 1643. par laquelle ledit Euesque luy auroit octroyé la conclusion de ladite requête. Acte de prise de fait & cause fait par l'Aduocat dudit

sieur de Kermesen pour le nommé de Gast, contre le Promoteur de Treguier le troisiéme May 1643. concernant le reuenu de ladite Chapelle receu par ledit de Gast, & par luy mis és mains dudit sieur de Kermesen, lequel estoit condamné par l'Official de rendre compte, & jusques à ce qu'il eust satisfait deffence de dire la Messe audit lieu. Sentence del'Official dudit Treguier du 6. dudit mois de May, portant que ledit Kermel rendroit compte dans quinzaine des deniers & aumosnes de ladite Chapelle & que ledit de Gast Fabriquain feroit le serment de bien & fidellement se comporter en l'administration desdites aumosnes, avec deffenses audit Kermesen de se mesler à l'aduenir en l'administration desdits deniers, & à faute de satisfaire dans le premier Iuin lors prochain, ladite Chapelle est interdite de nouveau. Requeste par ledit Kermel présentée au Parlement de Rennes, le 23. du mesme mois de May 1643. pour estre receu appellant comme d'abus de ladite interdiction, & main-leuée à luy faite, ensuitte de laquelle sont les conclusions du Procureur general, du lendemain 25. dudit mois. Sentence du sieur Euesque ou de son Official du 25. Aueil 1648. par laquelle ledit Kermesen est condamné.

rendre compte des aumosnes de ladite Chapelle deuant ledit Official, & qu'il seroit nommé vn Fabriqueur pour receuoir lesdites aumosnes, qui feroit le serment. Arrest dudit Parlement de Rennes du 3. May 1649. portant qu'il auoit esté mal, nullement & abusiement jugé & cassé le jugement, & le Promoteur condamné aux despens. Exploict de signification dudit Arrest audit Promoteur, & à luy fait commandement de payer la somme de vingt liures, pour lesdits despens, du 26. Iuillet audit an. Conuention faite entre ledit Kermesen, & Laurens Raymond, le 11. No- uembre 1651. Par laquelle ledit Raymond promet de seruir ladite Chapelle sainte Anne pendant trois ans, moyennant soixante liures par an, que ledit Kermesen promet luy payer, & de le releuer du blasme qu'il pourroit encourir dudit sieur Euesque, pour estre allé dire la Messe en ladite Chappelle. Sommation faite audit sieur Euesque de Treguier le 4. Iuillet 1652. de declarer s'il entendoit deffendre à tous Prestres de dire la Messe en ladite Chapelle, qui auroit dit ne vouloir rien respondre jusques à ce que ledit de Kermesen eust rendu compte. Exploict de signification faite audit sieur Euesque, le 28. Ianuier

1653. de l'Arrest du Parlement de Bretagne du 3. May 1653. Par lequel est enjoint audit sieur Euesque de leuer ledit interdit dans quinzaine à peine de saisie du temporel dudit Euesché. Arrest dudit Conseil interuenu sur la Requête des Agens generaux du Clergé de France le 30. dudit mois de May, portant entr'autres choses que les Marguilliers des Paroisses ayant esté aduertis du jour que les Euesques deuoient aller faire la visite de leurs Eglises, seront tenus de tenir leurs comptes prests pour les rendre ausdits sieurs Euesques, ou à leurs grands Vicaires pendant leursdites visites. Exploit de signification faite audit Euesque de Treguier le 10. Iuin audit an, de l'Arrest dudit Parlement du 21. May precedent. Requête par ledit Kermel présentée audit Parlement de Rennes, le 21. Aoust de la mesme année, sur laquelle auroit esté ordonné qu'iteratif commandement seroit fait audit sieur Euesque d'obeïr audit Arrest du 21. May, à peine de saisie du temporel dudit Euesché, signifié le 3. Septembre audit an. Arrest dudit Conseil, du 4. Fevrier 1654. portant éuocation generale de tous les procez que tous ceux qui auoient assisté aux derniers Estats de Bretagne auroient au Parlement de Rennes, &

renuoy d'iceux au Parlement de Paris, signifié au Greffier dudit Parlement, le 30. May audit an. Autre Arrest dudit Parlement du 23. Avril audit an, par lequel suivant les precedens Arrests, est enjoint au sieur Euesque de leuer l'interdit de ladite Chapelle de sainte Anne dans quinzaine, autrement seroit fait droit. Exploit de signification dudit Arrest audit sieur Euesque, du 29. May ensuiuant. Autre Requête présentée audit Parlement de Rennes par ledit Kermesen, le premier Iuillet ensuiuant, afin qu'il luy fust diffinitiuement permis d'apposer la saisie au reuenu temporel dudit Euesché, & les conclusions du Procureur general qui adherent à celles de ladite Requête. Sentence des juges Ecclesiastiques de Rennes du 17. Avril audit an, par laquelle ledit Raymond est condamné d'executer ladite commission du 11. Nouembre 1651. & aux despens. Autre Arrest dudit Parlement du sixiesme Aoust 1654. interuenu sur la requête dudit Kermesen, par lequel suivant les precedens Arrests, est enjoint audit sieur Euesque de leuer l'interdit de ladite Chapelle de sainte Anne, dans quinzaine, & à faute de ce faire, permis audit Kermel de faire saisir le reuenu temporel dudit Euesché, si

gnifié audit sieur Euesque le 3. Septembre
audit an. Appointemens de reglement à
communiquer, escrire & produire inter-
uenue entre les parties le 23. Decembre, en-
suiuant. Escritures & productions desdi-
tes parties. Requête dudit sieur Euesque
employée pour contredits contre la pro-
duction dudit Kermesen du 4. Mars 1655.
Requête de *subrogatur* du sieur Besnard
de Rezé Maistre des Requestes, du 19.
Ianuier audit an, signifié le 21. dudit mois.
Arrest du Conseil interuenue entre les par-
ties le 12. Mars ensuiuant, par lequel auant
faire droit sur l'instance auroit esté ordon-
né que dans huitaine pour tous delays les
parties adjousteront à leurs productions ce
que bon leur sembleroit, pour au rapport du
Commissaire leur estre fait droit ainsi qu'il
appartiendroit par raison, despens reser-
uez, signifié à l'aduocat dudit Kermel le 15.
dudit mois de Mars, aussi signifié audit
Aduocat ledit jour & an, par lequel ledit
sieur Euesque de Treguier, declare que
pour fatisfaire audit Arrest, il employe
ce qu'il auoit escrit & produit en l'in-
stance, & qu'il n'auoit rien à adjouster. ℞
Requête dudit Kermel du 26. Avril au-
dit an, à ce que sans auoir esgard aux
suppositions & productions inutiles dudit

sieur Euesque, les conclusions prises en l'instance par ledit Kermel luy soient adjudgées, & à ce que acte luy fust octroyé de ce que pour toute production au principal differend des parties, il employoit ce qu'il auoit escrit & produit auparauant ledit Arrest de retention du douziesme Mars dernier avec le contenu en ladite Requête, sur laquelle acte auroit esté octroyé dudit employ, & au surplus en jugeant, signifié le 27. dudit mois d'Avril dernier, employée pour contredits contre celle dudit de Kermel, signifiée le dernier dudit mois d'Avril. Autre Requête dudit de Kermel, du 20. May dernier, employée pour réponse à celle de contredits dudit sieur Euesque, signifiée le 22. dudit mois. Et tout ce que par lescdites parties a esté mis & produit pardeuers ledit sieur Besnard de Rezé, Commissaire à ce député. O v y son raport, apres en auoir par luy communiqué aux Sieurs deputez pour les affaires du Clergé, Conseillers audit Conseil, de l'Ordonnance d'iceluy du septiesme May dernier, signifiée le lendemain. Tout considéré. **LE ROY EN SON CONSEIL**, faisant droit sur l'instance, sans s'arrester aux Arrests des 3. May 1649. vingt-vniesme May, & vingt-vniesme Aoust 1653. 23. Avril

& 6. Aoust 1654. A ordonné & ordonne
que dans le mois apres la signification du
present Arrest, le compte des aumosnes &
offrandes de la Chapelle de Kermesen
pour le passé, sera rendu par ledit de Ker-
mel deuant le sieur Euesque de Treguier,
en son Hostel Episcopal, Et pour l'adue-
nir par l'Administrateur de ladite Confrai-
rie, qui sera choisi par l'aduis du Recteur
de la Paroisse de Vommerit, & dudit de
Kermel, à la charge de prester le serment
deuant ledit sieur Euesque, conforme-
ment aux Lettres d'erection d'icelle, du
8. Mars 1643. Faisant deffenses à toutes
autres personnes de s'immiscer en la per-
ception desdites aumosnes & offrandes.
Lequel sieur Euesque sera tenu de leuer
l'interdit de ladite Chapelle, sans despens.
Fait au Conseil Priué du Roy, tenu à Pa-
ris, le vingt-huictiesme jour de May 1655.
Signé, MAISSAT.

*Collationné à l'original, par moy Conseiller
Secretaire du Roy, & de ses Finances.*

Extrait du Privilege du Roy.

LE Roy par ses Lettres patentes a permis à Antoine Vitré son Imprimeur ordinaire, & du Clergé de son Royaume, d'imprimer, vendre & debiter tous les *Edits, Declarations, Arrests, & generally toutes les choses qui luy seront baillées par les Assemblées generales, & par les Agents generaux du Clergé*, & ce pour le temps & espace de neuf ans. Avec deffenses à tous autres de les imprimer, faire imprimer, contrefaire, ny d'en auoir d'autres que de l'impression dudit Vitré, à peine de six mil liures d'amande, confiscation des Exemplaires, despens, dommages & interests; comme il est porté plus au long par lesdites Lettres, Données à Paris le 15. Decembre 1651. Signées, Par le Roy en son Conseil, **PEPIN.** Et scellées.

